



Referat davart in nutriment saun
Doris Berther ha referì en l'ospital da l'Engiadina Bassa davart nutriment saun per il corp. **9**



Las cornas e las lunas da la natira
A Stierva han ins chattà in cada-ver da tshiev cum corna fitg speziala. **11**

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Spetgar il concept

Martin Jäger ha prendì posiziun areguard l'avegnir da La Quotidiana

■ (anr/ac) **Sche la confederaziun è pronta da sustegnair la gasetta dal di rumantscha per l'onn 2019 la sustegna er il chantun.** Quai resulta da la resposta dal cusseglier guvernativ Martin Jäger sin ina dumonda da la deputada Gabriela Tommaschett (pcd Cadi) il mardi passà en il cussegl grond.

La deputada Gabriela Tommaschett è sa referida a comunicaziuns che la finanziaziun da La Quotidiana saja garantida sulettamain fin l'onn 2018. Il cusseglier guvernativ, Martin Jäger ha fatg attent ch'i

saja mo excepziunalmain pussaivel al maun public da sustegnair La Quotidiana en ina fasa transitoria. Per pudair cuntinuar cun il sustegn pretendia la confederaziun in concept davart il futur da las medias da print rumantschas. La Lia Rumantscha saja londervi dad elavurar quel concept. Saja il concept sin maisa haja la confederaziun signalisà prontadad da sustegnair La Quotidiana per in ulteriur onn, ha Martin Jäger ditg avant il cussegl grond. Quai valia medemamain per il chantun Grischun.

Pronts per la nova stagiun da tir

■ (anr/gns) **Sco enconuscent ha quest onn lieu en dus mais en Surselva la Festa chantunala da tir.** Lantschada è la stagiun da tir vegnida sonda passada a Cuira ed a Landquart. Ils resultats conferman che noss matscheurs da 300 meters, da pistola e da 50 meters arma da

caliber pitschen èn gia en furma ed er pronts per la stagiun. Cun l'arma da militar en venter ha Hansruedi Giger da Tumejg tratg in nov record grischun cun in total da 578 puncts da 600 puncts pussaivels.

> PAGINA 8



Ils victurs da la distanza da 300 meters e da pistola: Elmar Fallet, Domenic Lorenzetti, Hansruedi Giger, Urs Brazerol e Walter Widmaier (da san.).

FOTO G. N. STGIER

In talent vegl

■ (anr/gv) Ch'el saveva malegiar haveva Sep Pfister emblidau. La veta dil mintgadi sco pur a Schlans ha buca purschiu ad el temps e peda per sviluppar quei talent. Ina consolara ha fatg attent in fegl digl um da 90 onns che quel savevi malegiar aschi bein en scola. Aschia ha Pfister discuvretg danovamein il talent e malegia cun rispli e cun colur

scenas ord la veta dil mintgadi dil temps vargau. Malegiond la veta da pur a Schlans e contuorn ei igl um cun interess multifar bugen cun sias regurdientschas si Prada da Schlans, in liug da bellezza singulara e per mintga pur da Schlans da valeta extraordinaria.

> PAGINA 3

L'ultima giada avant quatter onns

■ (anr/fa) L'ultim di da la sessiun d'avrigl ha la regenza gi bleda da responder. Normalmain respunda la regenza a chaschun da l'ura da dumondas ina buna dunzaina da quellas. Tar questa sessiun dentant ha ella gi da sa fatschentar cun 22 dumondas. L'ultima giada uschè bleras dumondas eran vegnidas inoltradas avant quatter onns, era quella giada durant la sessiun da primavera.

> PAGINA 2

Ils püfs e las lingias da forza electrica

■ (anr/afi) Dürant il prossem temp svanischan in Engiadina passa 1000 pütas da forza electrica e cun quei divers ogets privlus pel püf ed otersutschels grond. Las Ouvras Electricas d'Engiadina SA han realisà quai in collavuraziun cun la Staziun ornitologica da Sempach. Las aspettative da vita d'ün pulschin da püf es plüchöntscha da cuorta d'ürada. Sch'els survivan il prüm svuol e'l prüm invern han els bunas schanzas da cumprir bundant 30 onns.

> PAGINA 9

Diember da tscharvas stabil

En Surselva ei vegniu dumbräu levamein dapli tscharvas ch'avon in onn

DA HANS HUONDER / ANR

■ **Malgrad il stregn unviern ei il diember da tscharvas staus stabils en Surselva en cumparegliaziun cugl onn vargau. Las cundiziuns da dumbrar ils davos dis ein stadas fetg bunas.** Sco quei ch'il cau dalla regiun da catscha dalla Surselva, Arnold Caminada da Vrin, ha detg sin damonda dall'Agentura da novitads rumantscha ei la dumbraziun da tscharvas vegnida fatga l'jamna vargada ed ils davos dis. El district I che cumpegia il territori dalla Cadi ein 1235 tocs vegni dumbrai, el district II cun la Foppa e la Lumnezia 1263. Cun in total da 2498 tscharvas ei il diember bein empau pli aults ch'igl onn vargau (2225), mo las cundiziuns da dumbrar ein stadas bia meglieras. «Sunter quei stregn unviern e la biara neiv ch'ei ha aunc els aults eran las tscharvas els praus. Aschia havein nus giu fetg bunas relaziuns da dumbrar», di Arnold Caminada. Sin fundament da quellas cundiziuns optimalas vegn era la cefra nera adattada uonn: «Quella vegn segiramein buc ad esser



Malgrad il liung e stregn unviern ei vegniu dumbräu biaras tscharvas en Surselva.

FOTO H. HUONDER

aschi aulta sco igl onn vargau, aschia che nus plidein tut en tut d'in diember da tscharvas semegliont a quel da 2017.» Tenor Caminada fa quei grond diember da

tscharvas tuttina surstar empauet: «Sunter quei unviern fetg stregn quintavan nus cun pli paucas, mo tier las tscharvas dat ei adina puspei surprises.» Il

diember d'animals curdai – seigi tscharvas, cavreuls ni camutschs – svariescha. Buc en tuts loghens dalla Surselva ei igl unviern staus tuttina strengs.

Juniors e seniors che contan

Concert unic el Teater da Cuera

■ (anr/abc) **Sonda e dumengia ein il chor mischedau grischun Canziano ed il Chor d'affons Surselva stai sin tribuna el Teater da Cuera.** Pliras generaziuns ein stadas sin tribuna. Rodund 160 seniors e juniors han presentau sonda e dumengia el Teater da Cuera in concert unic. Ell'entira

Svizra dat ei buc in secund chor da seniors aschi grond. Il chor mischedau Canziano seproflescha dapi prest diesch onns cun concerts e presentaziuns. Igl atun vargau ha il dirigent Rico Peterelli giu l'idea d'organisar in concert cun in chor d'affons. Rilana Cadruvi, menadra dil Chor d'affons Sursel-

va, ei stada fiug e flomma pil project. La davosa fin d'jamna ha il publicum saviu guder il resultat da quella collaboraziun sut il tetel «Generationen/generaziuns». Ils dus chors han ina caussa communabla: Igl ei enzatgei essenzial.

> PAGINA 3



Il chor mischedau Canziano en accziun.

FOTO A. BEELI



30016



9 771424 749004

Servetsch d'abunents e da distribuziun: tel. 0844 226 226 mail: abo@somedia.ch



Il podest da la categoria arma da sport duas posiziuns: Georg Maurer, Domenic Lorenzetti e Cornelia Valentin (da san.). FOTOS G. N. STGIER

Noss matscheurs èn gia en furma

Uniun chantunala da tir dal Grischun

DA GION NUTEGN STGIER / ANR

■ **Cun l'occurrènza d'avertura a Cuira è la stagiun da tir 2018 lantschada. Las relaziuns optimalas han pussibilità als participants da far buns resultats. Hubert Tomaschett, il manader dals matscheurs grischuns, è cuntent cun las prestaziuns da ses tiradurs.** La stagiun da tir 2018 sin las distanzas da 300 meters, da pistola e da las armas 50 meters ha cumenzà sonda passada a Cuira ed a Landquart. Suenten la pausa d'enviern èn ils megliers tiradurs grischuns s'entupads al stan da tir Rossboden a Cuira per l'emprima concurrenza interna sin la distanza lunga. Quella ha lura mussà che noss matscheurs èn pronti per la stagiun ed er per la Festa chantunala da tir 2018 che ha lieu en dus mais en Surselva.

Nov record grischun

Las relaziuns èn stadas bunas uschia ch'ils tiradurs han discurre d'ina occurrènza correcte e cun ina buna vista. Tragt precis ha lura cunzunt *Hansruedi Giger* da Tumeigl cun far 578 puncts cun l'arma da militar en venter. Ses resultat excellent è a medem mument er in nov record grischun. Fin sonda passada era *Urs Nauli* da Tumeigl il purtader da quel record chantunal e quai cun 577 puncts. Tar il tir d'avertura actual ha el fatg 574 puncts e vegnì segund. Terz e daventà cun 571 puncts *Alessandro Rota* da Vicosoprano. Cun 564 puncts è *Robert Studer* da Castrisch be vegnì 5avel, in plaz che na corrispunda segir betg a ses potenzial ed a

sia qualitat. L'occurrènza duas posiziuns cun l'arma d'ordonnanza ha gudagnà *Walter Widmaier* da Schiers/Aschera cun 531 puncts. Il terz plaz ha cuntanschi *Peter Jemmi* da Castrisch e quai cun 509 puncts, in resultat ch'è per el bain plitost magher.

Danovamain Urs Brazerol

Ferm ha lura sajettà *Urs Brazerol* da Farera en la concurrenza arma da sport en venter. Suenten ils 60 sajets sin la schiba da 10 ha el scrit 591 puncts. Cun quel resultat da vaglia ha el danovamain gudagnà quella categoria sco gia il 2017.



Betg anc en furma para d'esser *Peter Jemmi*, il tiradur da Castrisch.

Meinrad Monsch, il matscheur da Zezras, ha tratg 581 puncts e vegnì sin plaz 2. Tar la categoria arma da standard duas posiziuns sa numna il victur *Domenic Lorenzetti*. Il tiradur da Cuira ha sajettà 571 puncts, trais dapli che *Georg Maurer* da Favugn sco segund.

Sco adina Elmar Fallet

Da la partida al tir d'avertura èn er stads ils pli fermes tiradurs da pistola da noss chantun. Tar quels tutga cunzunt *Elmar Fallet* da Müstair. Il campiuon svizzer 2017 da la distanza 50 meters, er el para gia d'esser bain en furma e pront per la stagiun. A Cuira ha il pur da 47 onns gist declassà ses concurrents cun sajettar 571 puncts. *Tim Wolf* dal Partenz, sco segund, perda tuttina 24 puncts sin il grond victur. Cumpletà il podest ha *Guido Zellweger* da Zernez grazia a ses 545 puncts.

Victoria per Coccia – plaz 2 per Tomaschett

Tragt lur program da 50 meters cun l'arma da caliber pitschen han ils tiradurs e las tiraduras a Landquart. Las duas concurrenzas da l'elita ha gudagnà *Lars Färber* da Favugn. En la categoria trais posiziuns è *Elena Tomaschett* da Rabius vegnida terza cun il resultat da 572, damai be dus puncts pli pauc ch'il victur. *Andri Tomaschett* da Trun è i cun la medaglia da bronz. Las categoiras dals giuvens han gudagnà en venter *Tino Coccia* da Rueun e la concurrenza da trais posiziuns *Natasha Bischof* da Mastrils.



Urs Brazerol è danovamain stà sisum il podest tar l'occurrènza da sonda passada.



Tragt bain ha er *Elena Tomaschett*, la Sursilvana e commembra dal cader nazional arma 50 meters.



Nagina concurrenza ha gi *Elmar Fallet*.



In plaz da podest dapli per *Guido Zellweger*.



Tino Coccia, il victur arma 50 meters en venter tar ils giuvens.



È cuntent cun las prestaziuns da ses umens: *Hubert Tomaschett*, il manader dals matscheurs grischuns.